

四庫全書

集部

欽定四庫全書

集部
海陵集卷之三
外集

詳校官庶吉士臣李如筠

主事臣呂雲棟覆勘

總校官編修臣王燕緒

校對官編修臣盧 遂

謄錄監生臣王爾熙

欽定四庫全書

海陵集卷二十一

雜文

乾龍節疏語

為天下君功已成於授舜使聖人壽志猶效於祝堯式
臨夢日之祥舉有望雲之喜敢虔修於淨供庶少盡於
丹衷密贊皇休仰憑梵力伏願孝慈淵聖皇帝陛下受

宋 周麟之 撰

天百祿夢帝九齡寶仗還南申享萬年之樂玉卮奉上
重開二聖之歡用叩佛乘永綏帝祉

天申節疏語

大火中天式屆朱明之候神光照室誕開炎德之符百
樂斯生四方來賀矧奉祠而均逸宜報上以益嚴迺縉
海藏之文庸致華封之祝伏願皇帝陛下壽絲箕翼福
固岡陵慶集東朝永御蟠桃之薦祥生中壺坐臻苜蓿
之和庶仗覺慈密諧至願

乾龍節疏語

舜歷已傳宜享萬年之報堯雲雖遠尚傾四海之心當
虹渚以紀辰詣靈祠而獻福仰憑妙慧密贊鴻休伏願
孝慈淵聖皇帝陛下運與日昇福侔川至指瑞星於南
極天仗遙歸授神藥於西山帝齡永錫

天申節進功德疏文

瑤光貫月丕昭誕聖之祥鷄火司辰甫近慶陽之旦用
歸誠於淨室以效祝於華封庶乘十力之因永贊萬年

之祐伏願皇帝陛下神開漢筴天畀義圖松茂引年永
享寧親之樂椒蕃毓慶洵垂奕世之休

天中節三省開啟滿散功德疏文

開啟

寶筴迎年載啟中天之運璿樞紀瑞於昭大電之符預
叩覺乘仰祈純佑皇帝陛下恭願有秩斯祜無疆惟休
億載萬年永錫金枝之茂五風十雨長瞻玉燭之明

滿散

帝執衡而司夏允協昌期天申命以用休篤生上聖既
具嚴於法會宜申行於福疇皇帝陛下恭願垂拱萬年
總道百祿玉闕靜柝生操偃革之功金篋賜齡永保垂
衣之治

進疏右語

夏曰長贏爰肇發祥之旦天其申命式孚介壽之休憑
梵刹之無邊祝帝齡之難老皇帝陛下恭願維祺錫羨
伊嘏來崇受策泰元四三皇而一視承顏長樂萬千歲

以同歡

乾龍節三省開啟滿散文并功德疏右語

開啟

為天下君已載傳於舜歷使聖人壽茲竊效於堯封爰
迎震夙之辰預建重修之席孝慈淵聖皇帝伏願克綏
永祿茂對闕休大輅鳴鑾慶言旋於北國卿雲復旦福
共固於南山

滿散

樞躔紀瑞聿當載震之辰梵唄祝釐用介無疆之壽孝
慈淵聖皇帝伏願緝熙純嘏保合太和坐格三神佑帝
齡而永錫更憑十力擁天仗以迺歸

功德疏右語

六龍以御早題出震之期萬壽無疆遙罄望雲之祝敢
陳覺品用贊皇釐孝慈淵聖皇帝伏願體固清明德孚
信順三靈垂祐永膺難老之符九筮襲祥終協必歸之
吉

天申節進功德疏文

天其申命用休欣逢聖旦臣能歸美以報敢効愚衷虔
依最上之乘仰祝無疆之算恭願皇帝陛下與天齊壽
如日常明龜鼎億齡永保衣裳之治闕河萬里坐觀圖
籍之歸

會慶節功德進疏

夢日儲休甫應大橫之兆流虹紀節共推華渚之祥敢
伏闕以馳誠用祝釐而介壽皇帝陛下恭願丕增鼎筮

茂保松齡兩殿承顏長拱稱觴之會四夷交臂競趨執
玉之朝於萬斯年永錫難老

天申節功德疏

脫屣堯塔席歸尊之大養奉卮漢殿當誕聖之昌期雖
違拱極之居逾切望雲之祝光堯壽聖太上皇帝陛下
恭願帝齡錫羨邦統延休申命自天增衍泰元之筭頤
神高世永符上古之椿

會慶節功德進疏

慶善發祥夙紀二龍之瑞華封贊壽仰申三祝之誠敢
憑力於齋熏用繹休于佑命皇帝陛下恭願丕圖鼎固
介福川增九陞垂衣受單于之朝賀萬年戲綵承太上
之燕頤俯同有截之區誕保無疆之祐

皇后生辰功德疏

伏以桂月澄秋協巳中之灝氣椒風紀旦揆載風之初
祥恭陳三洞之章仰祝萬年之算皇后殿下伏願擁坤
元之厚福儂天極之常明金篋賜齡與聖人而齊壽瑤

箱獻瑞錫皇祚以彌昌妾無任虔祈激切之至

天申節三省開啟滿散并進疏右語

開啟

星火御辰當赤帝乘離之序渚虹流慶兆真人出震之
期率百辟以傾心叩三乘而贊壽皇帝陛下恭願道全
久照業固丕承垂拱萬年永保後天之算本支百世更
延錫祚之休

滿散

華渚發祥爰肇聖生之旦寶坊祈祐用申天錫之休茲
闡妙因既周彌月皇帝陛下恭願岱嵩儲社箕翼昇齡
萬里同文普洽無刑之治百神受職共扶有道之長

進疏右語

電樞虹渚有開聖旦之嘉祥金鑑露囊莫盡人臣之美
報敢陳梵刹用侈闕休皇帝陛下恭願丕鞏蘿圖茂將
第履五兵不試永綏仁壽之民九敘惟歌誕保平成之
治

三省提點以下疏語

星虹紀旦茂昭載震之祥葵藿傾心仰祝無疆之算敢
依歸於十力申抃蹈於三呼皇帝陛下恭願申命用休
永錫難老萃祥光於南極同我太平協壽紀於東朝受
茲介福

到筠州生日醮謝青詞

九闕投佩驟闔君恩一舸沂江幸依神祐敢露積精之
悃仰酬洪覆之私伏念臣頃以瑣材濫塵機地力微任

重已慙轅下之駒福過災生忽覩坐隅之鵬旋嬰大戾
斥處偏州攜二百指骨肉之親涉三千里波濤之險焱
馳借便駛若雲飛水宿迷津沆無夜警僅閱再旬之紀
即安環堵之居皆荷顯休敢稽昭報會設弧之初旦修
薦葷之令儀祇演冲科肅延景馭願迪留俞之鑒曲垂
下濟之光丹筆蕩瑕早脫大呵之域絳霄垂眷永扶世
德之門

夫人生日小醮青詞

至神善應常享于克誠諸福難名莫長於無禍輒忘最
陋敢叩穹隆伏念臣多難餘生遠方擯處惟與閨門之
聚苟圖歲月之安載念孤蹤尤資內助迺卜初生之旦
虔伸列聖之祈願監由衷曲垂孚佑俯同幼累盡滌宿
殃早被洪恩遙歸故里

壬午生朝玉隆宮設醮青詞

錦帷下覆仰千載之真庭蓬天前陳協一陽之令序祇
拜紫煥之幄具瞻丹悃之辭伏念臣早絆名韁自投罪

畧浮家蹈難嘗遠涉於風波闔戶省愆已坐彌於歲月
猥緣中夏惕軫危憂遙瞻背土之光仰控延真之懇屬
臨初度恭展夙心翳柏星壇夙企駭鸞之馭承雲葉爰
虔披鏤玉之文庶格高旒密垂妙蔭長江鼓拽送千里
之歸艗別墅扶犁保一門之聚指

生日醮青詞

與物飛潛悉由造化在天倚伏或許修禳伏念臣多難
相仍宿愆未洗自衡廬之小憩苦橫事之交侵揆度復

初揭虔申禱願垂有赫之鑒俾祓不祥之氛道邇時和
蠲除罪垢庶同生聚獲保壽臧

夫人生日設醮青詞

浮家蹈難僅獲生還息駕圖寧敢忘順助伏念臣蚤違
怙恃內倚妻孥顧憂患之相從期宴安之克享匪憑覆
燾曷遑灾虞迺涓設悅之辰虔露叩閣之請馳神三景
願丐真麻錫社一門同膺善慶

神功妙濟真君殿還醮疏文

天浮羽蓋莫攀上漢之旂地闕瑤宮舉託棲真之庇敢
披素臆用叩神扃念困躓之餘生稔流離之多難幼承
先訓獲聽淨明之篇中坐謫居適鄰冲舉之地揆茲塵
迹知有夙因圖繪睟容躬每勤於嚴奉顧瞻寶篆動必
對以傾祈頃當盛暑之時行力拯幼童之疾苦仰丹青
惟肖之像控金石不渝之言茲卜令辰特趨恭館祓蘭
場於邃殿延飈馭於層霄演秘瓊科薦芳藻奠荷靈休
之默相沆醮範之熙成婦綴綺幡映霓旌而杳藹子闕

龍藏運雷轂以回旋願鑒由衷益彰助順送長川之歸
艦護故里之安巢望銅柯手植之青身如柏茂酌錦水
盃分之綠福比川流

神功妙濟真君祝香文

大道難名故不言而善應高真在上凡有感而必通爰
申齋肅之誠用闡赫靈之懿恭惟神功妙濟真君智該
萬法神合九天積陰功在多劫之前傳孝道為泉真之
長授經神母寶籙全開置竹蜀源息波溥暨鍊丹祠石

室之奧礪劍濯梅山之湍斷蛇母而聚骨成洲協赤鳥
之瑞應叱蜃精而變形伏刃滅黃犢之妖蹤至於鑄鐵
柱以弭水災化鴿孟而脫人禍種德周行於當世疑神
復隱於舊山居數十年壽踰百歲時惟八月告朔云初
俄有二仙乘雲而下宣王皇之詔命授太史之僊階勅
大力天丁以照耀之光告仲秋月望為冲舉之節亟陳
讌飲會別鄉鄰休辰俄及於日中廣樂遂來於天際列
青童之仗建寶節而曳瓊旌服紫綵之袍登龍車而御

羽蓋干煙霄而直上與雞犬以同升摠衣三百餘人惟
七君得執策而駢乘聚族四十二口至一門皆背土以
凌空徒聞稚耆之悲號已悵仙凡之隻隔游帷雖墮景
馭難攀但驚卿靄之漫山猶挹異香之經日事具聞於
前志福垂裕於後人迨至皇朝肇加顯號賁嚴宸之玉
冊新福地之琳宮蓋度世已越千齡其炳靈有如一曰
壇下之枯柯復茂嶺頭之棄木猶生摹天篆以鏡珉尚
存遺刻禱聖籤而探簡益仰明威臣猥以微生夙承妙

陰敢涓清旦就禮眸容願垂降釐之輝俾迪同休之貺
天清地泰國壽民康及我室家悉除災沴永堅一念不
回鄉道之心或在五陵願與得仙之數

歲旦祠五福太一文

象著圜穹咸仰十神之貴名分太一首推五福之尊惟
真馭之所臨有休符之畢至比占神筭行次艮維數之
以四十五年適協賤生之初度叅之以二十八舍是為
元命之本宮敢於歲旦之初恭俟臚存之至肅陳菲供

虔露精誠桂酒椒漿聊效楚人之奠雲車風馬願同漢
時之留伏念臣夙荷真麻幸逃多難茲尚縻於罪罟尤
切望於行綦欣逢運數之自然默冀天人之相應庶幾
眇質與有多祺紫幄遙開既導迎於景貺青藜下照將
永託於餘輝

祭竈文

赤精之君維大庭氏運乘火德功配炎帝紀官立名以
任民事沒為明神利及後世託祀於竈式從其類周監

二代肇建王制始於司命列之七祀上自天子庶人庶
士曰竈之祀禮得通置考之呂令遇夏則祭其數惟三
自孟及季席門之奧當陞布位立主迎尸俎實先肺設
盛于南奉陳黍醴設饌于前裒列鼎餼多儀孔嘉禮經
所志漢秩百神官有祠吏族人先炊晉巫是繫武皇紹
休尊尚方熾少君妄陳神物可致丹砂化金為飲食器
延年訪仙類乖古意夜見其貌事涉妖異自時厥後國
禮湮廢士民之家間聞一二子嚴在官入舍除治祭竈

請鄰世高其義陰氏之興慶來有自子方仁孝物被恩
施臘日晨炊德感神至形象恍然閔室環視乃封黃羊
再拜奠跪坐致富盛錢流于地田廬貨財輿馬僕隸比
於邦君繫君之惠三世而昌子孫蕃熾神貺昭昭載諸
傳記奈今愚氓輒或慢易嬉聚庖舍頑奴悍婢謂神弗
聞強爭善詈謂神弗顧聚汙穢舉爨弗時頑塵弗彗
踞觝狂坐席薪裸寐上或失察下莫知避宜爾有家十
窮九匱由爾弗敬觸禁干忌神唾弃之福不汝畀門交

鑿巫目眩砭劑宣其慢神而獲斯戾自今以始各敬其
義戒爾廚人告爾主饋罔不夙夜汛掃嚴侍滌者去滌
毋遏流漬煬者屠火毋縱臙熾炊者候湯沃焦止沸烹
者調飪節和五味餒食毋飫或噫而噎怒毋喧號喜毋
笑戲神斯安之作我藩衛除我疾疢驅我淫厲豐我儲
廩富我龜幣五窮之鬼引帆夜逝左餐右粥呼吸和氣
神人咸寧受福不替有葳苾芬吉蠲為饎有酒清泚舉
觴以醉尚其歆之永叨靈庇

初除同知樞密院告家廟祝文

曾孫周某蒙恩除同知樞密院事已上謝訖敢昭告于
某人烜兮吾門世有膺仕身為從臣自藐孤始簪索五
年洊登政地閱閱所無豈敢有覬本大末茂實繇積累
潛德之報顯融在此晉拜云初幽明具喜惟靈鑒之永
錫蕃祉

初封三代祭告遠祖祝文

積德之深燾後必大吾宗六世既債而振以不肖身被

服天寵追爵曾廟幽泉與榮拜命之初不敢不告

海陵集卷二十一

欽定四庫全書

海陵集卷二十二

宋 周麟之 撰

雜文

焚黃祭告家廟祝文

逖惟我祖西蜀之英爰自國初起于清城名登諫垣以
直著名德施九江式洪厥聲活民數千闔境既寧掩骼
倍萬叢冢是銘繼易守符遂家海陵坡陀北原卜云其

興三子甲科叔也晚成千餘年間並建雙旌四枝騰芳
五葉紹榮桂籍相望奕世用宏曩厄變故忽如流萍浮
江而南伏于巖坳惟不肖孤困苦零丁更比百罹僅存
餘生幸賴遺業安于筆耕孰陰佑之既塞而亨連叨兩
科王畿始登迺游儒宮列於仙瀛紫微三年遽以罪行
乙亥之冬主化頓更剗革蠹弊搜聘賢能時自郡貳亦
蒙弓旌召對褒勞佐謨承明主知既深歲一甄升載筆
螭坳入侍紫清演綸鳳閣愈久弗勝俄兼內制正列貳

卿帝曰汝嘉予方厲精汝實遠器用其敢輕東臺邃嚴
大政所經汝往司之論駁必平既踐夕瑣有言帝聽曾
不期年陞冠鰲局恩禮具優懼弗克承含毫史闌何裨
汗青槌句經幄但抱寶磬玉堂之畫大賜濫膺五雲擁
笥鳳翥龍騰顯寵特厚光于在廷退惟寒儒日戒滿盈
帝將屬任試之銓衡半歲區區姦伏是懲帝曰汝嘉屢
見褒稱旋頒御禮擢貳機庭王人在門被命若驚屢茲
控辭渙汗莫停宣伊庸謏堪此寵靈舉藉餘廕扶其孤

博實荷先訓發其潛冥罔極之報語塞涕零所幸重泉
追典及曾念我三世皆以文鳴嗟嗟數竒老於儒黌曾
門詩宗古律鏗鉤太白襄陽與之爭衡經明行修擅美
鄉評授道里門莫振其翎祖也逮事幸識典刑厚德博
施汪然淵渟春秋一藝先覺所聆晚發登科獨立無朋
以黃綬終喪亂相乘惟先隱君實大聲闕氣壓崧岱學
包滄溟潔已自修如玉壺冰振藻鮮洒協彼咸莖刻意
忘倦殆逾雪螢困躓場屋曾弗中程義方所傳匪以金

簾母氏淑慧率禮罔更粵自總州教之準繩口授書傳
快若建瓴頃值多難僅逃弓矰德充於身天不與齡尺
波電謝永痛如醒及親之養三釜莫營既終閱艱隻影
伶俜人所唾棄怵心勞形豈意自全抗于霄鵬視此鼎
茵寧不兢兢得君之羹徒列於銅讀父之書有涕如傾
遙望丘墓惕焉以驚邈彼海澱孰艾其荆渺渺江許綠
野雲平銅官之南有山峻增方仕于朝官守所縈川塗
阻修未獲展聆綸書既降爛若日星備述遺範潛光畢

呈鈿軸金葩絲絡錦滕列布在廟耀于兩楹儲宮二品
有華其纓副笄六珈湯賦且增具繇諸副以告潔誠徐
當具儀遍走諸瑩諒其監知來顧予烝永錫多祉惠于
雲仍

祭竈文

具位周某以客舍修竈畢工用伸祈謝者居而借宅敢
圖黥突之安食以養生難廢治庖之潔既繕修之甫畢
宜禳祓之惟虔嘗聞家有主神竈為司命念飲食膳饌

之自出當去故以從新故聰明正直之所臨可弭災而
致福歷觀前志具著顯休託赤帝之靈威尚乘火王備
黃羊之美薦或致財豐猶獲結比鄰之歡豈惟稱老婦
之祭某萍流至止匏繫于茲囊索不充恨未能數米而
炊稱薪而爨篋瓢自適思欲以晚食當肉安步當車顧
雖厨傳之蕭然所幸妻孥之樂爾屬臨歲暮將迓春祺
撤觚竇之傾頽新瓦墁之矜飾聊陳不腆之具用冀有
神之歆俾我一門膺時百順春種有繼不至于甑中生

塵含哺無憂靡患乎牙頭浙米若陶令之瓶儲有繼則
齊卿之列鼎何求約王大夫之髯奴每滌盃而整案送
韓吏部之窮鬼毋揆手而覆羹共慶新年即還故里當
與閨門之聚永嚴伏臘之祠

先考諱日誦金剛經薦疏文

佛說第一波羅蜜見聞夙有因緣人居大千世界中持
誦勝於布施矧效劬勞之報當生淨信之誠爰即諱辰
用資冥福先考少師伏願離一切相發最上乘種諸佛

之善根證如來之法眼歷多劫百千萬億頓超夢幻之
觀憑是經三十二章永脫輪回之苦

御書玉堂跋尾

臣近於經帷奏事因言昨被旨撰皇子賜字上宣諭曰
此學士院故事不欲廢也臣恭聆玉音竊仰聖主深略
緯文遠猷繩武事無鉅細允迪前徽一出言不忘典故
而禁林自祖宗以來優寵詞臣賚貺非一昔有巨麗今
獨闕焉睿訓及之不可嘿已即具奏國朝淳化初太宗

皇帝嘗以飛白書玉堂等四字賜翰林學士蘇易簡謂
宰臣曰易簡告朕求此數字卿可召至中書授之他日
為翰林中美事字徑二尺餘龍鵠之勢曲盡神妙曩更
變故石本亦罕有存者恭惟皇帝陛下聖筆天縱超冠
百王萬幾燕閒染翰弗輟龍文龜畫刊在翠琰布列中
外焜耀羣目學宮儒館賁飾尤多惟是玉堂直廬密邇
清禁臣愚猥以末技誤膺簡擢典司內命丁辰晏清書
詔甚稀鈴緘不鳴愒日無補曾弗能考援故事裨緝闕

典以為萬年無窮之休臣則有罪敢昧死以請制曰可
越翼日內出玉堂二大字以賜奎壁煥爛自天而下寶
氣昭倬發葩燭幽啟緘竦瞻爵躍詠歎視前世所謂龍
跳天門虎卧鳳闕者不足以進於此顧臣譎陋大懼弗
稱及入謝復得請於都省宣示宰執俟中祕暴書俾侍
從館閣官咸得觀仰仍以石本分賜士林歆豔皇乎哉
中興之偉觀一代之彌文也臣謹按玉堂本漢別殿名
未央宮與清涼宮溫神仙人長年金華白虎麒麟列峙相

望更不詳著而畧見於李尋翼奉傳然則玉堂蓋殿名也待詔者有直廬在焉故尋自謂久污玉堂之直易簡所乞太宗所賜實取諸此後避英廟諱至紹聖中始撮取二字榜于院而識者非之謂不當以前代殿名皇朝寶札榜之於臣下止息之所今臣建請則所不敢惟是仰承德意勒石旌事以永億載之傳廣四方之藏侈儒生千一之遇使天下後世咸知皇帝陛下典學稽古迪文右賢藝并於道能潤色鴻業不廢故事如此則渥恩

出於非常舊典振於已墜皆不失太宗皇帝本意豐功
盛烈醲化懿綱巍乎與淳化比隆矣輒舉大槩書于下
方用對揚明天子丕顯休命

跋先君講春秋序後

先君潛心春秋二十年得成說於郵上孫先生莘老其
書家傳三世矣兵火焚蕩遂為煨燼及寓居江浙嘗誦
其說以授學者予每得竊聽之一日先君為予言初王
荊公欲釋春秋以行於天下而莘老之書已出一見而

有苦心自知不復能出其右遂詆聖經而廢之曰此斷爛朝報也不列於學官不用於貢舉儲積有年爰自近世是經復行而學士大夫亦罕知有莘老說也已而歎曰吁孫先生之書其遂湮沒已乎何其久而未顯也某應之曰此書豐城寶也隱顯亦各有時不幸而埋光鏹采於今之世然而龍泉太阿之氣自當夜動牛斗復有達識之士如張茂先輩表而出之以為天下後世發蒙之器亦必有日矣後數年有文定胡公著春秋傳以進

于上學者皆傳之而先君不及見也予近得之嘗反復其義蓋與莘老之說合者十常六七然莘老發明聖人之奧舉三傳以斷得失反復折中著為通論其旨詳而明深而當異說不得而破此其邃處文定似不及也因暇閱講序併述于後

跋德友兄所藏後湖帖

頃歲先隱君見養直於鷺洲之南山谷間以詩酒相從甚久予時尚幼亦熟其風度如遊張公壇及醉中失冠

之作皆有和篇別數年客有以真止軒詩來者亦繼其韻予竊笑曰是非欲醉烟波弄明月者烏能之自此不復相聞矣舊亦有數十帖今不知何在而吾兄乃能寶藏如此真好事之尤者先隱君嘗謂兄曰聞子之賢久矣子能與養直游賢乎哉此吾家月旦評也

跋李侍郎青龍詩後

張子房運籌決勝貌若婦人女子予與侍郎游十餘年矣但見其謹厚謙畏而臨事乃能犯難不懼如此以是

知侍郎亦惟幄中人云

跋張叅政墨跡

毗陵公筆法妙絕一世今子弟皆刻意文藝巖然有諸父風子年蓋升其堂濟其哉者也不知寶此帖必知所以繼之

跋張叅政兄弟唱和詩

余頃游毗陵公之門聞其論詩詳矣而公之詩恨不多見晚年作四老堂詩句格超詣高壓唐律今觀此數篇

雖游戲皆造乎妙三復歎仰不已

仁宗皇帝賜楚建中御飛白記

臣仰惟仁宗皇帝在位四十二年治蹟之懿與天地同功原其本治不過以德為元氣然後揭故令而日月之霈利澤而雨露之萃人材而淵嶽之至其心術之妙形於筆墨者則又星斗爛而雲漢倬也今奎畫垂耀後世金石之刻惟飛白為多此非獨天縱之能蓋胸中之所經緯筆下之所卷舒見于治道皆一理爾觀宸札之運

也騁而安迅而紆婉而勁揚之者若翔抑之者若墜放
之欲周乎八極之表斂之靡失於一毫之間則凡所以
綱紀庶務斡旋至化者實於此乎見之一時在廷多被
褒賜若龜龍二字晏元獻得之端敏二字王安簡得之
傳記所聞不可殫舉而諫議楚公所得乃帝字也嗚呼
帝其有深旨乎豈不曰堯舜之所以帝其弼直也其謨
明也其嘉言罔伏也諫議公當是時位在言責論事剴
切傑然無所避是能陳堯舜之道以帝其君者也賜書

之意其在茲與惟楚氏自昭輔事藝祖開國為佐命大
臣勲在盟府至是公復以名德進踐歷四朝為時顯人
以出處之槩考之不惟其直聲著聞也西虜薛老峯以
三十萬衆納款詔許之公力疏其詐未幾果劫受降使
叛去其識慮之精蓋如此將漕者更數路會朝廷考諸
道殿最奏課為天下第一遂除三司鹽鐵副使其才力
之敏又如此晚年辭樞臣之名歸老于洛與文潞公司
馬溫公游觴詠高會列于耆英終身樂之則志節之清

又如此公之孫興年懼先德之澆汨又念其家藏書詔
漂燬殆盡惟存此寶墨思所以昭示於無窮迺磨崖勒
之且俾為之記因備載顛末以侈休烈庶使公之來裔
見此者皆知自勉以世其家焉公諱建中景祐初舉進
士歷官諫議大夫天章閣待制後累贈少保云

圓通閣瑞光記

杭之俗尚佛樂施蓋自錢氏始承平時西湖三百寺號
為東南冠而城中亦名藍相望靈蹟勝槩往往與兩山

爭雄寇亂以來蕩為飛埃縑徒散亡三十餘年間復振
起者鮮惟千頃廣化院首能即故基而新之有其人焉
爾慧覺總持大師善彬敏辨嚴潔精意佛乘不溺它技
舍其寺之東偏闢觀音道場脩演教法憑大智力為一
方護念救民諸苦病者已死者超有禱必應遠近嚮之
善彬以菩薩每示白衣像于夢慨然慕念營求累年因
得圓通相適與夢合雕繪立成悉如素志懺宇既新靈
異不可勝紀然其規制尚狹善彬感焉思所以為壯觀

而聳動人耳目者遂發大願別建層閣重簷上加疊屋
予竊怪之人亦曰善彬素無銖兩也此費無藝惡乎成
閱再歲予過之則重簷飛拱已傑出乎樓殿之上矣瑞
像莊嚴百用具脩蓋糜錢萬餘緡皆士庶欣然助之善
彬於落成之初期以四十九晝夜修行佛會用報恩布
既逾月矣感通非一夢天竺山烟雲四合中有五色光
湧出又夢衣白者以寶瓶授舍利三善彬心異之不懈
益虔忽於第六七日五鼓初懺禮之次讚歎之間道場

中現大琉璃色放百寶光晃耀燄爍經數刻不散善彬呼其徒瞻禮無不肅然動心焉有僧自外至見是夕閣中有光燭天如晝善彬亟以是告予而求為之記噫日月燈皆光也日烜乎晝月昱乎夜日月所不照燈燭揚其光故經有日月燈佛是三者不能皆具具之者佛菩薩也日過酉則八月過晦則伏燈無膏則熄而佛菩薩之光常在也常在而不常見由人心之有操捨存亡也予故以是記之而繫以贊曰

諸佛觀世間光滿十方界衆生弗知覺皆由執迷故人
能振塵淨諸闇悉朝徹垢盡見明鑑雲開睹白日始知
諸佛光無來亦無去念彼寶閣成一精追力乃於脩
禮次示現大光明諸佛本無疑惟以爾心得是心不退
轉光乃常在目光本不可名而我尚何贊為一切衆生
埽除顛倒想同歸一光中永劫不斷滅

海陵集卷二十二

欽定四庫全書

海陵集卷二十三

宋 周麟之 撰

碑銘

張循王神道碑

宋故安民靖難功臣太師靜江寧武靖海軍節度使清
河郡王食邑一萬五千七百戶食實封六千六百戶致
仕追封循王諡忠烈張俊神道碑

左通直郎試中書舍人兼實錄院同修撰兼權直學士院臣周某奉勅撰

惟循王既葬之四年其子子顏泣而言於朝曰先臣幸備位三公儋爵析珪勲在盟府今丘木拱矣圖所以較德焯勤者猶未稱懼弗紹以泯前人光請得以碑立于隧皇帝曰噫惟爾父有勞于我國家予弗爾忘惟爾從遂詔臣曰汝典內史近命爾直寓于某林改為之銘後數日諭宰相曰功臣張某宜賜謚朕念其蚤以忠力屢

經委任平敵扞難功勤尤著可取危身奉上安民有功
之義謚曰忠烈翼日臣進對于垂拱殿上曰張某自元
帥府提兵從衛備罄心膂至為大將總戎旅于外獨知
奉君上尊朝廷及釋師而歸受命惟謹其終始恭順誠
不與他帥比故報卹追榮恩禮特異汝其志之朕將有
勸焉臣仰佩聖訓既退歎息然後知公之明光盛大福
祿永終蓋一本於恭順以是而著之碑章視來世用為
天下勸臣不敢辭迺端拜而言曰自古帝王之興所與

戡定禍亂蓄攘四方捍固丕業必一時人豪感會風雲
翼戴其上助成萬世之功嘗觀漢唐間元勳宿將以異
姓王顯者彪列簡冊代不乏人然求其能以功名克終
為後世稱慕實無幾在高祖時惟鄴君不失正道慶流
支庶申令書其忠至德以後惟郭尚父全名高節爛然
獨著議者莫之貶今聖主中興總挈英傑克翦多難惟
故循王張公以忠誠衛上保有成績富貴壽考哀榮無
窮居一代之冠海內崇仰之而莫知所以致然者此其

為恭順之至歟公諱俊字伯英其先鳳翔人五世祖徙秦州子孫遂為秦州三陽人曾祖守明贈太師吳國公曾祖妣石氏吳國夫人祖慶贈太師韓國公祖妣田氏韓國夫人考密贈太師魯國公妣謝氏魯國夫人公少孤事母孝謹祖母田氏夫人器之謂其母曰是兒必興吾門既壯負氣節善騎射里豪不能誣初從官軍討南蠻再攻夏人皆賈勇先登累授保義郎宣和五年邊事興郡邑多盜主帥种師道以沈毅有勇使當寇衝遂破

鄆賊李太子賊河子追至洛州擊平之六年破大名賊于超化寺追至內黃又破內黃賊數千人七年破沂賊三萬人追擊至密州襲密賊于莒縣及南樓山又破之還沂破賊張先于礪鼓山又破濰州羣賊于地方村以前後戰功遷官至武德郎八年濟南賊孫列齧據鐸子山衆號十萬公討之未陳以一天斃其挑戰者破之餘黨亦平自是河朔山東無劇盜公威名益震靖康元年以隊將從种師中救太原次榆次與敵遇公乘便擊之

奪馬千匹公力請要戰主帥以日不利退保敵諜知之
悉兵合圍攻且急榆次陷師中死之公與數百騎潰圍
而出至烏河川敵尾之公大呼斬首五百授武義大夫
權河北十三將時上為天下兵馬大元帥檄諸道兵入
援京師公乃勒兵勤王以十二月二十二日至北京見
上擢元帥府統制每語時事無不當上意日親近待以
腹心出入帷幄初元帥府兵軍尚寡至是軍勢乃壯進
武功大夫滎州刺史二年盜李昱據任城公為都統討

之公控險伺間與麾下將楊存中數騎馳入賊壁大軍繼之賊殲焉轉右武大夫桂州團練使上以公忠實可用尋遷貴州防禦使獨倚公為重會左丞張證自京師來詔大元帥趣入覲公曰此敵人詭謀爾大王居外此乃天授非人力所為慎毋往因請進兵自濟之鄯或告高才欲為亂公伐其謀才遁去加左武大夫徐州觀察使二帝北狩諸軍議勸進公言于上曰大王人心所歸願早正位號以慰天下望且又白耿南仲奏之表三上

上乃發濟州至應天即皇帝位遣公迎隆祐太后及六宮以歸上悅命帶御器械是後平杜用于淮寧又平趙萬郭青于鎮江定杭州擒陳通取婺州射殺何三五縛秀州賊徐明斬之聞者驚服進寧武軍承宣使建炎三年上駐蹕維揚召諸將議事公曰今敵勢方張宜南渡據江為險練習兵政撫安民心俟國勢定圖之時相不以為然未幾敵人至公亟扈大駕濟江上幸臨安公屯吳江入平苗劉之亂拜鎮西軍節度使及敵人犯江浙

公率衆軍從上於明州鑾輿御舟師巡永嘉留公禦之
賜親札曰惟卿忠勇事朕累年朕非卿則倡義誰先卿
捨朕則前功俱廢卿宜勦力共扞敵兵一戰成功當封
王爵敵至公乃扼險為陳令將士曰若等于此當以死
報國家不用命者斬部曲聞之爭奮公親鼓之人人殊
死鬪敵大奔殺獲數萬人四年正月敵悉精銳復至公
先以輕舟彊弩匿其旁自高橋縱兵擊之一日數戰敵
失利而還詔入衛拜檢校少保定江昭慶軍節度使紹

興改元李成以江淮湖湘十餘州連兵百萬與羣盜合
欲內嚮聲勢撼中外孔彥舟因之據武陵張用據湘漢
朝廷患之議遣將未決公慨然請行乃以公為江淮招
討使即日就道抵洪州徑濟生采渡過賊前鋒擊走之
追及筠州成驍將馬進以數十萬衆決戰公以兩軍分
道翼之預戒其下秣馬蓐食視旌旗所嚮公冒雨陷陳
金鼓俱振兩道精騎自山馳下賊駭亂死者數萬人俘
二萬人逐至奉新敗之于樓子莊又敗之于江州賊怖

走號公為張鐵山上以親札賜之曰以李成之狡獪馬
進之猖狂盤踞已深根連已固卿奮勵決策頻有克復
快士民之意釋朝廷之憂且朕待卿最親卿事朕最久
君臣之際休戚是同宜乘賊勢之已衰當官軍之已振
驅除勦戮連收全功時成在蘄州公亟引兵至黃梅攻
之賊潰成以匹馬奔偽齊諸郡悉平江淮之民德公至
今祠之凱旋拜太尉四年以公為浙西江東安撫使屯
建康時敵人陳江北公遣將張宗顏潛渡出其後敵窘

蹇又遣王進等邀擊之薄諸淮敵大敗獲其二帥以獻
五年正月拜開府儀同三司江南東路宣撫使六年劉
豫遣子麟猗以十萬衆寇濠州詔併以淮西兵馬屬公
駐盱眙公遣將楊存中先擊猗左右軍勝之會大兵鏖
戰終日所殺不可勝計麟猗僅以身免偽齊由是遂亡
班師拜少保加鎮洮崇信奉寧軍節度使上親賜詔曰
卿專意報國如此朕復何慮改淮南西路宣撫使九年
金國通和上眷公忠勞之績拜少傅加安民靖難功臣十

年敵人再陷河南圍順昌公被命援劉錡即督軍渡江
與錡勢合敵引去公又命將收宿亳二州盡復衛真鹿
邑等地遣其校獻俘闕下明年正月敵將以步騎數十
萬自合肥取和州將渡采石江浙大恐公先引帳下數
十騎夜絕采石奪和州衆心始安明日大軍至敵退守
昭關公又奪關師次柘臯敵人斷石梁面水為壘解鞍
休馬公謂諸將曰急擊勿失公時有寒疾諸將欲止之
公不聽乃力疾涉淺流登岸與敵合戰士馬激厲無不

一當百獲萬戶長千戶長數百人牛馬鎧杖以萬計上遣中使勞軍公感泣俄而敵將復犯濠州王師乘柘臯之銳馳赴之敵以步騎三十萬相持于濠南公麾兵進擊敵宵潰橫尸數十里敵將逃歸進少師封濟國公兼河南北諸路招討使十一年和議成四月詔大將詣行在拜公樞密使賜玉帶公聞命而乞納兵自謂不當復領宣撫司章再上論者以為得大臣體加太傅廣國公方是時朝廷以山陽武昌諸屯不安命公拊循之或曰

彼多反側盍為備公笑曰何自疑如此至則慰勞士卒
宣布德意遣人諭武昌軍帖然安堵還次鎮江因調護
南北使之在道者上知其能體國益嘉之明年春還朝
四上章乞解樞務不許秋梓宮歸祐陵皇太后御慈寧
宮公復理前章又面懇切至上不能奪乃以太傅鎮洮
寧武奉寧軍節度使進封清河郡王充醴泉觀使奉朝
請賜第一區繼以郊恩改靖江寧武靖海軍二十一年
上幸第存勞甚篤拜太師子孫各進官加等二十四年

六月以疾聞上遣中貴人撫問命國醫朝夕診視七月
二日薨于正寢享年六十有九上震悼輟視朝三日追
封循王賜一品禮服親奠于賜第勞恤其孤及宗族恩
各有差命內侍省押班張去為護喪事以是年九月十
一日葬于常州無錫縣塘灣山配秦國夫人魏氏先公
薨繼室榮國夫人章氏五男子琦武義大夫子厚左武
大夫康州刺史帶御器械皆早世子頽子正右文修撰
子仁祕閣修撰四女長適武功大夫秦公僅先公卒次

適直徽猷閣韓彥朴次適右承務郎程湜次適直敷文閣劉堯勛孫宗元尚書駕部郎中曾孫鎡直祕閣公貌雄偉性渾厚嚴重家人莫見其喜愠臨敵應變謀無遺策大小數百戰未嘗言功征行戍守師律整齊納亡撫降至得其死力尤喜任使今之名將多出其門如楊存中田師中趙密皆公所識用餘雖偏裨布在諸路分按營壘者亦甚衆待同列謙下唯以國事為先不校小嫌此公平生大槩顯顯在人耳目者若夫密謀祕畫有以

契上心裨廟算公終身固不以語於人人亦莫得而闕也初諸大帥各將屯要地一旦歸授以樞筦四方無不聳動公恬然就列以身先之安其所處若未始有兵權在手者蓋公平日用心惟在於尊獎王室故能忘私徇公自始至卒秉節不渝無非恭順之實云嗚呼公之積功固多矣天子之報功亦備至於褒表恭順則又當具論而顯表之使握兵者知所法焉夫恭順臣子之大節也事親非此不能致其孝事君非此不能成其忠況為

帥者乎將帥顛閫外之任權盛則勢多陵功高則志易滿其可不以恭順持之彼拔劍擊柱者束之以禮然後定背闕詳語者繩之以法然後戢又烏知所謂恭順者哉昔之論將者曰富之而觀其無犯貴之而觀其無驕使之而觀其無隱誠有取於此也今公之功暴耀當世街談巷議之徒識與不識皆得以縷數惟恭順一節有諸將之所難能衆人之所弗察者臣故表而出之用對揚明天子之休命系以銘曰

多難啟聖維天之仁是生傑才佐佑人民如龍之升滂
然其雲維皇中興有此虎臣虎臣維何王胙于循矯矯
維王孔武且洵自帝初載執羈扈巡入衛宸扆出澄寇
氛大敵之乘虎豹為羣舉麾卻之笑談策勳來歸于朝
避擢納軍諭我德意撫安列屯密勿機地委蛇其身身
則不有所尊者君帝曰恭順時莫與倫人知其功我念
厥德惟恭惟順斯德之則向也諸帥怙衆而愎公居其
間謹度自抑向也諸帥動曰吾力公居其間載巽載默

晚焉奉朝夙夜祇飭宜壽而富保厥成績何以寵之受
瑞南國一命賜袞帶裳幅舄三鎮聯麾轟鉞旂戟匪伊
寵之用勸羣辟錫山之莪佳城鬱鬱豐碑在道絢若金
石垂光無窮過者必式

葛文康公神道碑

文康葛公自元符末以文章名天下登朝歷學校禮樂
之任至國子長貳爾後二十年數躋終不苟合宣和間
親黨柄國聲燄震中外人謂公即大用矣公時已久誅

為郡縣汝徒湖聞將有燕山之舉亟以書遺之其畧曰
今東南奠枕西北歡盟公之功莫大于此然天下無事
則宰相安宰相生事則天下危願公享宰相之安毋使
天下至于危也是行實過關例得入覲相省書不說乃
盡日令便道之官未幾燕山之役興斂民間免夫錢以
助軍用急若星火比屋駭懼浙西仍歲水潦公持檄覺
然有憂色顧佐吏曰吾民方艱食奈何議欲減其半衆
爭言不可公曰苟利於民死且不辭卒奏減之公平生

以氣節自負議論鯁挺未嘗一俯首為貴倨下雖位不
補德士大夫深惜之然識者多其有守以是尊仰焉公
既沒十餘年公子立方以墓隧之刻來請銘于某某生
也後不獲游公之門然頃以史事與纂修先朝實錄見
公出處大槩矣又嘗讀公遺集及諸先生長者言所聞
蓋如此今復得公之壻章侗所為狀而考之益不誣銘
不可辭則舉以冠其首然後按公之世次官闕行治掇
其大者追序而顯論之公諱勝仲字魯卿其先嬴姓夏

后世封國於葛後因以為氏漢魏之際著籍廣陵唐天
祐中有諱濤者避孫楊連兵之禍徙江陰家焉其子虧
太宗時以高年有德賜爵公士虧生詳公高祖也隱居
不仕曾大父惟甫贈吏部尚書配曰陳留郡太君吳氏
大父密承議郎贈通議大夫配曰胡氏陳氏皆碩人父
書思以朝奉郎致仕累贈少師母侍其氏秦國夫人自
尚書而下三世踵登進士科通議早棄官悟性理之學
自號草堂逸老少師以清德純孝聞既卒州上其事詔

特謚清孝公幼警慧誦書日數千言九歲能屬文時出
驚人語少師異之年十六應開封舉中其選紹聖四年
擢進士第律學方興公游其間繞閱月于法令貫通若
素習一試即為冠調杭州右司理叅軍杭為劇郡多訟
訴岸圉往往充斥吏習為舞文市獄公至痛繩以法而
於推鞠必委曲詳盡囚感公之哀矜咸吐情無隱旬月
間留獄一空吏畏懼不敢以儒生易之府帥豐稷知公
為偉人屢薦於朝文節林公希赴名京師一見公謂曰

君文詞經術宜範模多士獄訟冗職溷君爾因薦試學
官公以詩書禮三經試于有司又試宏詞俱第一士林
歆豔見其文以為不可及公之聲聞自是彌大矣除教
授兗州學公以充先聖國益自刻勵朝夕講學訓諸生
人得所未聞靡不悅服鼓篋踵堂者輻輳至弗能容乃
移書部使者丐錢增闢而新之且豐其餼廩鄉校之盛
遂冠諸郡人為太學正少師書謂公曰士積學非獨為
己蓋將淑諸人汝其勉旃公既迎養不以官卑祿薄日

營涓灑之奉極其誠至上幸學四方士獻歌頌者甚衆公奏賦數千言祕書省第名上之公居其首已而丁外艱毀憾過制終喪屏酒肉弗御閱浮屠氏大藏經周其卷帙服除為提舉議歷所檢討官是歲行明堂禮官升朝者例封贈公居職若半歲則於格當改奉議郎預計之適在秋享後乞減秩一等前期受命朝廷嘉之特改道直郎由是恩及泉壤繼知大宗正寺丞事檢討如故議歷所初以從臣提舉至是郭天信代之公深嫉其人

弗欲與共事力求去天信曰公豈久于此者能暫屈相
從正字指日可得公曰富貴在天儒者但當顧義耳遂
罷歷局縉紳稱公為難能除祕書省正字遷尚書考功
員外郎以親嫌改禮部時郡國上符瑞者逕至公掌南
宮牋奏或日草數牘無滯思人皆服其敏而工會御史
中丞石公弼上言僖祖原廟增置殿室違元豐之舊詔
禮官議公謂有其舉之莫敢廢也予而復奪在常人猶
難況在天之靈乎與時論不合責知歙州休寧縣歙在

江東號難治而休寧巖邑也民鬪狠尤甚公視事親決
疑獄洞見欺隱姦吏不得肆邑中以為神明聽訟先與
辯曲直徐告以慈孝禮遜之節民多感泣息所爭未踰
月獄虛課為一路最部刺史文薦之更數歲復召為禮
部員外以預議元圭進一官遷吏部擢國子司業公嘗
患成均之士為文率一律恐其寢入卑陋考試必取卓
然不羣者置前列由是文格一變諸生習雅樂既成上
御崇政殿按試大悅謂輔臣曰士成於樂可謂文物之

盛聲調與工師不同手詔褒諭增秩遷太常少卿國朝
自歐陽文忠公以建隆訖嘉祐禮儀沿革纂成一書凡
百篇號太常因革禮至是命公續之公用前書條目增
脩為三百卷於是治平以後五十年禮文之事粲然在
目詔藏于奉常太子府初建以公兼右諭德公每見太
子必言治心修身之要為仁孝學三論獻之太子嘉納
復採春秋戰國以來歷代太子善惡成敗之迹日近數
事久則成書十卷號承華詔媿云徙太府少卿盛章以

諂附權貴驟用為開封尹忽遣其子并謂公曰外府左遷吾能為公即還舊物許之乎公正色曰進退百官當自宰相僕不佞顧肯由他岐進以重速戾哉并歸以告章大慙恨聞者趨之除國子祭酒遷大司成賜對衣金帶入謝上曰卿在朝不惟以文字著稱實有靖共之操且曰觀每月私試程文高下甚當其為上所知遇如此公退而語家人曰吾自布衣致身侍從當有以報國前此不敢越職論事今豈宜默乃數求對言治亂大計與

時政得失貴要咸切齒公自是不安於朝矣俄提舉江
州太平觀宣和元年朝廷明公非辜復右文殿修撰知
汝州京西多曠土寶元康定間特輕其賦募民墾闢歲
久地無遺利而民益富政和初言利者始議增稅民已
不能支其後宦官李彥謂京西之民率冒占官地括其
田而籍之號西城所破產者紛紛或朝為豪姓暮乞丐
於市公下車數月適彥至大肆苛暴人多逃匿避禍公
見彥泣曰斯民離散深所不忍願公少寬之且請蠲數

千戶不當括者彥大怒曰是欲沮壞西城新法邪草奏
劾公朝廷壯公敢為寢其奏不行大河歲修埽岸費稍
草不貲皆取辦旁郡而汝特倍民罷不堪命公喟然上
疏乞免且令民緩輸待命轉運使以不及期督日峻公
奏免益急僚屬惶怖莫知所為公慰撫之曰諸君第勿
書紙尾吾獨任其責頃之免符下民叶謹交賀畫公像
歲時率子孫羅拜相語曰微葛公吾儕非餓死即流徙
異鄉能復自保於此乎前太守嘗建言崆峒山實黃帝

問道之所宜築宮奉廣成子既得請則竭力以事土木
工未究公至主觀道士出大言脅公繼前役公叱之曰歲
饑民匱可困以不急乎即上疏乞須豐登有旨特從公
之內剛不畏彊禦類如此復顯謨閣待制徙湖州六年
又徙鄧州公在湖未劬嘗求鷓鴣白雀之屬公弗與劬
銜之由此橫加媒孽遂落職提舉江州太平觀靖康之冬
金人再至闕二帝北狩公時寓平江聞之西嚮號慟白
郡守曰趣帥師勤王又曰犬元帥在濟南以表勸進不

可緩因呼左右索紙筆立草數百言俾守即遣官持詣
元帥府詞旨懇切讀者流涕建炎四年復集英殿脩撰
再知湖州自金人蹂江浙盜賊竄起人情恟恟朝不謀
夕民見公復來懽迎蔽路會劇賊邵青欲道江入湖窺
伺是州公乃大修城郭作戰艦數百分部隊以綵幟別
之日閱試陳法而加賞罰士卒皆精勇可用民恃以不
恐賊望風引去有項孫誠於烏墩鎮殺傷官吏居民散
走公亟遣單騎齎樞密院旗榜招之曰今日降後自可

得美官賊徒相戒曰葛使君至誠不吾給也即投戈就
降是歲大饑斗米踰千錢餓殍相枕籍公既發官廩又
輸已穀數百斛遣官吏賑給之右姓爭出穀為助他郡
之饑者咸襁負而至公於城內外闢僧舍若亭驛以處
之薪釜管籍之屬無一不備全活不可勝計建炎初太
守梁端嘗獲謀叛軍人童照并其黨數十被加職之寵
告者皆命以官至是復有效之者公察其誣笑曰吾豈
肯殺無罪而利己乎遂錄付獄果無迹狀因坐誣告者

徙之闔境肅然公在郡能究心庶事雖甚微不輕委其屬視民惟恐傷之見利害施罷不俟日適時多艱疲於應接慨然有退休之志紹興改元復顯謨閣待制提舉亳州明道宮乃築室寶溪之上山水環湊名人魁士杖策造門公為之賦詩飲酒樂而不厭去則觀書著文課子孫習儒藝商論不暫輟閨門之內絃誦相聞若庠序然尤喜釋氏書謂其邃處多與吾儒合有時禪寂宴坐凝然終日或夜分不寐如是者十有四年易簣之夕數

聞異香索水盥手合爪掌跏趺端坐久之北首右脅而
卧薨于正寢蓋釋典所謂如來涅槃相者享年七十有
三實紹興十四年九月八日也爵丹陽郡開國侯虛二
千戶真食一百戶階自通直郎以年若賞及致仕十七
遷為左宣奉大夫遺表上贈特進明年九月壬申葬于
江陰軍由里山之原又明年太常考功以公之行實言
于朝曰道德博聞曰文安樂撫民曰康宜賜謚文康詔
從之以其子立方列於朝累贈少傅配張氏贈魏國夫

人金紫光祿大夫磐之女有賢行先公卒子六人立方
左朝散大夫前權尚書吏部侍郎立中右迪功郎前河
北路鹽香司幹辦公事而立器立卓立豫立參皆早卒
今立方知袁州女三人長適左朝請大夫主管台州崇
道觀許暘次適右承務郎監登聞鼓院劉封次適左朝
散郎通判泰州章侗孫男五郭右從政郎臨安府新城
縣丞郊左宣教郎江東路轉運司幹辦公事邵左宣教
郎太平州州學教授鄰右承奉郎湖州歸安縣丞郊右

承奉郎監潭州南嶽廟郭邠嘗預國子為名儒孫女六
長適左儒林郎臨安府司法叅軍沈洵次適右迪功郎
新饒州安仁縣尉章湜次適左承議郎主管台州崇道
觀張本餘未行聘曾孫四拚縉皆將仕郎次尚幼公問
學敏博書無所不讀一過目終身不忘研窮經旨難祗
寒隆暑不廢文雄贍而復精深醇密衆製各採其妙紀
事尤不苟凡子之葬其親非得公文識墓則必歎然詩
清麗有句法與賓客登臨宴賞即席援筆立成文不加

點坐者莫不驚異嗟服公在孕時其夫人夢鳳凰集于
庭既而生公人知其為文字之祥及中兩科歸清孝公
又夢歐陽文忠公授公以巨硯自茲文益進信非偶然
也有文集八十卷外集二十卷考古通論六十卷傳於
世公為人間蕩樂易遇物盡誠勇於義若嗜欲不靳財
費調人之急從弟濟仲貧甚官之先已子族女之孤不
能自存者則為之辦裝遣擇所歸租入悉推以畀同產
於奇玩一無所好臨事敢為不畏禍患遭權倖巧中屢

致齟齬處之怡然或問其故公曰吾道當如是又何悔
在太學為師儒之日多禮闈試貢士必與考閱公於數
句中輒知其學之淺深是以多得奇士誨人則先德行
後詞章故諸生皆知自重薦士惟取其器識凡所汲引
位輔佐禁從臺閣者相望天下咸推公知人四為二千
石所至有惠政治吳興民愛之尤篤去之日挽車號泣
祖送數十里不絕及聞其喪雖深山窮谷中無不流涕
至今言公猶以手加額頌歎不已嗚呼天下無全才久

矣綴學之士文豔用寡或劣于任劇至若嫻吏事則類多舞智趨勢為幸進計不失節者幾希如公以英儒發身以循吏著績而又能以介特之守卓然獨立於當世可無憾于銘銘曰

葛為名門世禪厥文祖也累科雲仍其芬自祖潘之既濬弗施迨公發之浩乎莫涯匪殖斯學惟得之卓實敏實博先民而覺甫登膠庠載煜其光勿毀勿荒士式而臧既屬既長既究所養終始不爽承帝之獎惟此吏道

治則弗擾所試者小吏之師表勇于為仁仁行如春我
知愛民遑卹吾身汝鄧之區崇蔽其廬民歌袴襦再騰
于湖人孰不藝器徇則蔽人孰不吏術勝則詭竄竄文
康通乎大方內全吾剛靡怵於彊彼相回適孰矻其失
公弗與暱曾莫我屈考公平生實大聲闕展如有成見
道甚明晚卧林壑避囂自樂安禪澹泊心若雲廓瞻彼
江干有山盤盤豐珉歸然千載之傳

中書趙舍人墓誌銘

自中興三十餘年間廷策天下士其卓然號為一時魁
傑者往往皆出東南歲在辛未蜀人趙公始以瓌瑋博
達之文入奉大對首論臣子事君父忠孝之大節言約
意確洞見胸臆天子竒之親擢為第一授左承事郎簽
書劔南東川節度判官公事秩滿召為祕書省校書郎
明年自著作佐郎遷著作郎不數日除起居郎丁丑春
正月同知貢舉夏六月拜中書舍人冬十月以卒後三
年其孤暮自蜀以書來請曰先君仕于朝同出處者公

也先君不幸死公哭之哀卹之厚今葬有日矣銘先君
以詔諸幽公為宜予得書曰噫予尚忍銘公哉予與公
自東觀歷左右史掌外制皆同日並命為僚久且密知
公實深雖不忍銘銘不可已乃為公敘之公諱遠字莊
叔姓趙氏家本秦也八世祖銀青光祿大夫處崇徙居
于蜀遂為資州人曾大父可以季子贈官至大中大夫
祖宗亮父衍贈右承事郎母馬氏何氏皆太孺人公少
穎悟一讀書數行俱下甫冠嫻於文章所至求見者如

市性廉靜不以世事介意居官行已安恬自有所守其在潼川簿書獄訟能以身親之符行中總領四川財賦暴橫無敢抗者有子興薦意公必為類試考官密以文屬公公不啟緘既試符氏子不得奏符怒以他事攬撫甚峻終莫能言公亦不少屈也及入館閣未嘗輒以私一至時相府時相欲出白金助公以家來公不答時相怒人為公危之未幾時相死上親擘庶事屏姦擢良風俗一變忽有旨以蕪普安郡王恩平郡王府教授即日

引對上曰卿乃朕自擢秦檜日薦士曾無一語及卿以此知卿不附權貴真天子門生也又曰兩王方學詩冀有以切磋之公因奏言路久壅願陛下廣覽兼聽勿以賤微為間庶養成敢言之氣上嘉納洎為侍從益以誠實見知嘗入謝上曰朕所以用卿卿既知之朝有關政無鉅細直助朕也又諭廷臣曰趙逵純正可用其為上所如遇如此一旦公有疾予過之問焉公喟然曰疾其不瘳乎昨夢驅車若將入館者或曰此給舍養病坊也

汝當為秘書監居無何疾亟力上章請外弗許後數日
予因進對上首問公得疾狀論方劑甚悉且曰庸醫惡
知此遣侍醫視之而疾不可為矣享年四十有一訃聞
上悼惜不已出內府銀絹各三百賻之贈左朝請郎官
其子壻各一人敕沿路漕臣護其喪歸蜀以葬是行也
母老子弱旅櫬數千里浮長江上三峽間關險阻幾再
歲始得至鄉邑道路聞者識與不識皆哀之公先娶汝
氏未歸而卒贈孺人繼室支氏封孺人一子四女暮承

務郎監潭州南嶽廟長女適右迪功郎新差監成都府
商稅務支燾餘尚幼以紹興三十年某月日葬于普州
安岳縣永康鄉東北山之原公既沒哀其文得三十卷
藏于家公平生無他好獨喜收聚古書考歷代治亂興
衰之迹而權其至要為文根據亦以古為歸內行脩潔
不見過差嘗語人曰司馬溫公不近非色不取非財吾
雖不肖庶幾似之上本以大用期公而公亦厚自涵養
欲有所建明不幸死矣嗚呼士君子必有所不為而後

可與有為有所不為知所為也知所為者矜其所不為而安於所為也可與有為不必為也不必為者不待其有所為而知其必有為也曩者權臣用事附己者卿相可以立得公於此時有貴賤死生之變而處之泰然終不以彼易此亦不以是自高是不矜其所不為而安之也聖天子秉哲臨下得其才於遠方稠衆之中察其賢於羣小競鶩之際意其臨大事必將有所謂不可奪者而不克見也至今猶思之是不待其有所為而知之也

賢乎哉銘曰

蜀有偉人今之卿雲既珪璧其身亦黼黻其文內抱道
以全其真而方榮親而方得君胡奄焉以淪詩之幽石
尚不泯



海陵集卷二十三